



## **O‘ZBEKISTON RESPUBLIKASI XALQ TA’LIMI VAZIRINING BUYRUG‘I**

### **“Yilning eng yaxshi fan o‘qituvchisi-2020” respublika tanlovini o‘tkazish to‘g‘risida**

Xalq ta’limi tizimida faoliyat olib borayotgan fan o‘qituvchilari orasidan ilg‘or, ijodkor, mahoratli, tashabbuskor, fidoyi, yoshlarni barkamol shaxs etib tarbiyalashga munosib hissa qo‘shayotgan, o‘quv-tarbiya jarayonida innovatsion texnologiyalardan unumli foydalanib, samarali natijalarga erishayotgan o‘qituvchilarni aniqlash va ish tajribalarini ommalashtirish maqsadida **buyuraman:**

#### **1. Quyidagilar:**

“Yilning eng yaxshi fan o‘qituvchisi-2020” respublika tanlovini (keyingi o‘rinlarda tanlov deb yuritiladi) o‘tkazish tartibi to‘g‘risidagi nizom (keyingi o‘rinlarda Nizom deb yuritiladi) 1-ilovaga muvofiq;

tanlovni o‘tkazish tartibi sxemasi 2-ilovaga muvofiq;

tanlovni tashkil etish va o‘tkazish bo‘yicha respublika tashkiliy qo‘mitasi tarkibi 3-ilovaga muvofiq;

tanlov bosqichlarini o‘tkazish muddatlari 4-ilovaga muvofiq;

tanlov o‘tkaziladigan fanlar ro‘yxati va Respublika bosqichi o‘tkaziladigan hududlar 5-ilovaga muvofiq tasdiqlansin.

**2. Qoraqalpog‘iston Respublikasi xalq ta’limi vaziri, Toshkent shahar xalq ta’limi bosh boshqarmasi va viloyatlar xalq ta’limi boshqarmalari boshliqlari, tuman (shahar) xalq ta’limi bo‘limlari mudirlariga:**

besh kun muddatda Nizom bilan barcha pedagog xodimlarni tanishtirish hamda tanlovning hududiy saralash bosqichlari (keyingi o‘rinlarda birinchi va ikkinchi bosqichlar deb yuritiladi) uchun tashkiliy qo‘mitalarni shakllantirish;

bir hafta muddatda kompyuter qurilmalari va zaruriy jihozlar bilan ta’minlanganligi, ishtirokchilarning kelib-ketish sharoitlarini inobatga olgan holda, tanlovning birinchi va ikkinchi bosqichlari o‘tkaziladigan ta’lim muassasalarini belgilash hamda tanlov shartlarini o‘tkazish reja-jadvalini ishlab chiqish;

tanlovning birinchi va ikkinchi bosqichlarini mazkur buyruqning 3-ilovasida ko'rsatilgan muddatlarda uyushqoqlik bilan shaffof, xolisona va adolatli o'tkazishni ta'minlash;

tajribali pedagoglar, avvalgi yillarda "Yilning eng yaxshi fan o'qituvchisi" tanlovining respublika bosqichi g'oliblari hamda oliy ta'lim muassasalari, xalq ta'limi xodimlarini qayta tayyorlash va malakasini oshirish hududiy markazlarining professor-o'qituvchilarini jalb etgan holda hakamlar hay'ati, ekspert va apellyatsiya komissiyalarini shakllantirish va tasdiqlash;

budjet va homiylik mablag'lari, qonunda taqiqlanmagan boshqa manbalar hamda kasaba uyushmalari tashkilotlarini jalb etgan holda tanlov g'oliblarini o'rnatilgan tartibda rag'batlantirish;

tanlov g'oliblarining navbatdagi bosqichlarda muvaffaqiyatli ishtirok etishlari uchun amaliy yordam ko'rsatish;

tanlov bosqichlari yakuni yuzasidan hujjatlarni nizomda belgilangan talablar asosida rasmiylashtirish hamda har bir bosqich yakuni bo'yicha Respublika tashkiliy qo'mitasiga axborot berish;

tanlovning respublika bosqichi (keyingi o'rinlarda uchinchi bosqich deb yuritiladi) ishtirokchilari va respublika hakamlar hay'ati tarkibiga kiritilgan mutaxassislarni Respublika tashkiliy qo'mitasi belgilagan muddatlarda tanlov o'tkaziladigan hududlarga o'z vaqtida yetib kelishini ta'minlash vazifalari yuklatilsin.

### 3. Respublika ta'lim markazi (H.Daminov)ga:

besh kun muddatda "Yilning eng yaxshi fan o'qituvchisi-2020" respublika tanlovini o'tkazish tartibi va baholash mezonlarini ishlab chiqish, testlar bankini shakllantirish hamda Respublika tashkiliy qo'mitasiga tasdiqlash uchun kiritish;

joriy yilning 20-may kuniga qadar tanlovning uchinchi bosqichi ishtirokchilari ro'yxatini shakllantirish;

tanlovning birinchi va ikkinchi bosqichlarini o'tkazish va hujjatlarni rasmiylashtirish yuzasidan hududiy boshqarmalarga amaliy yordam ko'rsatish;

belgilangan muddatlarda tanlovning barcha bosqichlari uchun test jarayonlarini onlayn o'tkazish hamda natijalarni umumlashtirish bo'yicha samarali hisoblangan elektron dasturni tayyorlash, shakllantirilgan testlar bankini joylashtirish;

joylarda o'tkaziladigan test sinovlari jarayonlarida elektron dasturdan foydalanish bo'yicha amaliy yordam ko'rsatish;

har bir bosqich natijalarini umumlashtirish va tahlil qilish hamda Xalq ta'limi vazirligiga axborot kiritish vazifalari yuklatilsin.

4. Xalq ta'limi sohasida axborot kommunikatsiya texnologiyalarini rivojlantirish markazi (Sh.Qayumov) Respublika ta'lim markaziga tanlovning onlayn test jarayonini tashkil qilishda AKT sohasidagi malakali mutaxassislar va texnik tomondan amaliy yordam ko'rsatsin.

5. Umumiy o'rta ta'lim muassasalari faoliyatini muvofiqlashtirish boshqarmasi (E.Murodov), Respublika ta'lim markazi (H.Daminov) bilan birgalikda:

“Yilning eng yaxshi fan o'qituvchisi-2020” respublika tanlovini o'tkazish tartibi va baholash mezonlarini tashkiliy qo'mita bayonnomasi bilan tasdiqlangan holda joylarga yetkazish;

tanlovning barcha bosqichlari o'tkazilishidan 2 kun avval test o'tkazish dasturi va uning ta'minotini xatlovdan o'tkazish hamda materiallarning maxfiyligini ta'minlash;

tanlovga tayyorgarlik ko'rish va o'tkazish jarayonlarini muvofiqlashtirish, tanlovning respublika bosqichida ekspert komissiyasi, hakamlar hay'ati a'zolarining adolatli, xolisona faoliyatini nazorat qilib borish;

hududiy xalq ta'limi boshqarmalari bilan birgalikda tanlovning uchinchi bosqichi o'tkaziladigan ta'lim muassasalarini belgilash, muassasalarda tanlovni o'tkazish uchun zarur bo'lgan shart-sharoitlarni yaratish, ishtirokchilarni kutib olish, kerakli jihozlar va texnika vositalari bilan ta'minlash choralarini ko'rish vazifalari yuklatilsin.

6. Jamoatchilik va ommaviy axborot vositalari bilan aloqalar bo'limi (A.Umarov)ga:

bir hafta muddatda mazkur buyruq bilan tasdiqlangan Nizomni keng jamoatchilikka yetkazish;

ommaviy axborot vositalari hamda vazirlikning [www.uzedu.uz](http://www.uzedu.uz) rasmiy veb-sayti orqali tanlovni tashkil etish va o'tkazish jarayonlarini yoritib borish tavsiya etilsin.

7. Tanlovning barcha bosqichlarini o'tkazish uchun jalb etilgan xodimlarning xizmat safari bilan bog'liq sarf-xarajatlari belgilangan tartibda ularning asosiy ish joylaridan qoplanishi nazarda tutilsin.

8. Belgilab qo'yilsinki, “Yilning eng yaxshi fan o'qituvchisi-2020” tanlovini o'tkazishda nizom talablariga rioya etmagan, turli noqonuniy xatti-harakatlar, ta'magirlik, korrupsiya holatlariga yo'l qo'ygan mas'ul shaxslar qonunchilikda belgilangan tartibda javobgarlikka tortiladi.

9. Tashkiliy-nazorat va tahlil boshqarmasi (Z.Tadjibaev) ushbu buyruqda berilgan topshiriqlar ijrosi nazoratini o'rnatilgan tartibda olib borsin.

10. Ushbu buyruqning qabul qilinishi munosabati bilan Xalq ta'limi vazirining 2019-yil 14-martdagi "Yilning eng yaxshi fan o'qituvchisi respublika tanlovini o'tkazish to'g'risida"gi 92-sonli buyrug'i o'z kuchini yo'qotgan deb hisoblansin.

11. Mazkur buyruqning ijrosini nazorat qilishni o'z zimnamda qoldiraman.

**Vazir**

**Sh.Shermatov**

Toshkent sh.,  
2020 yil "5" mart  
66 -son



**"Yilning eng yaxshi fan o'qituvchisi-2020"**  
**respublika tanlovini o'tkazish tartibi to'g'risidagi**  
**NIZOM**

**1-bob. Umumiy qoidalar**

1. Mazkur Nizom Xalq ta'limi vazirligi tizimidagi umumiy o'rta ta'lim muassasalari (umumta'lim maktablari, ixtisoslashtirilgan davlat umumta'lim maktabi va maktab-internat) o'qituvchilari o'rtasida har bir fan bo'yicha "Yilning eng yaxshi fan o'qituvchisi-2020" respublika tanlovini (keyingi o'rinlarda tanlov deb yuritiladi) tashkil etish va o'tkazish tartibini belgilaydi.

2. Tanlovni o'tkazish bilan bog'liq barcha masalalarni Xalq ta'limi vazirligi tomonidan tasdiqlangan Respublika tashkiliy qo'mitasi hamda Respublika ta'lim markazi muvofiqlashtiradi.

3. Tanlov ushbu Nizomda keltirilgan sxema asosida o'tkaziladi.

**2-bob. Tanlovning maqsad va vazifalari**

4. Tanlovni tashkil etish va o'tkazishning maqsadi fan o'qituvchilari orasidan ilg'or, ijodkor, mahoratli, tashabbuskor, fidoyi o'qituvchilarni aniqlash, ularning ijodiy faolligini oshirish, yoshlarni barkamol shaxs etib tarbiyalashga munosib hissa qo'shayotgan, o'quv-tarbiya jarayonida innovatsion texnologiyalardan unumli foydalanib, samarali natijalarga erishayotgan o'qituvchilarning ish tajribalarini ommalashtirish, ularni qo'llab-quvvatlash va rag'batlantirish, jamiyatda o'qituvchilik kasbining nufuzini yanada oshirishdan iborat.

5. Tanlovning asosiy vazifalari etib quyidagilar belgilanadi:

a) umumiy o'rta ta'lim muassasalarining o'qituvchilari orasidan fanlar bo'yicha ilg'or, tashabbuskor va ijodkor o'qituvchilarni aniqlash;

b) umumiy o'rta ta'lim muassasalarida faoliyat yuritayotgan o'qituvchilar orasidan yuksak kasb mahoratiga ega bo'lgan, o'z fani, mutaxassisligining haqiqiy egalarini saralab olish;

d) ta'lim-tarbiya jarayonida samara beradigan muqobil metodlarni hamda texnologiyalarni aniqlash;

e) umumta'lim fanlarini o'qitishda mavjud muammolarni aniqlash va ularni bartaraf etish yo'llarini muvofiqlashtirish;

f) o'qituvchilarning ilg'or ish tajribalarini ommalashtirish va keng targ'ib etish, ularning o'z metodik maktabini yaratishga yo'naltirish;

g) o'qituvchining yuksak ma'naviyatli, axloqiy fazilatlari, tashabbuskorligi va ijodkorligini keng jamoatchilik orasida targ'ib qilish;

h) yuksak kasbiy mahoratga ega, faol va izlanuvchan o'qituvchilarni rag'batlantirish.

### 3-bob. Tanlov bosqichlari va ishtirokchilari

6. Tanlov Xalq ta'limi vazirligi tomonidan tasdiqlangan fanlar bo'yicha uch bosqichda o'tkaziladi:

**birinchi bosqich** – tuman (shahar) miqyosida;

**ikkinchi bosqich** – Qoraqalpog'iston Respublikasi, Toshkent shahar va viloyatlar miqyosida;

**uchinchi bosqich** – Respublika miqyosida.

7. Har bir bosqichni o'tkazish muddatlari Xalq ta'limi vazirligi tomonidan belgilanadi.

8. Tanlovda umumiy o'rta ta'lim maktablarida dars berayotgan oliy ma'lumotli, kamida 2 (ikki) yillik pedagogik stajga ega bo'lgan o'qituvchilar ishtirok etishlari mumkin.

9. Tanlovning birinchi bosqichida ishtirokchilar soni chegaralanmaydi. Har bir o'qituvchi faqat bitta fandan qatnashish huquqiga ega.

10. Hududiy xalq ta'limi boshqaruv idoralari va vazirlikka bevosita bo'ysunuvchi umumta'lim muassasalarining o'qituvchilari ta'lim muassasasi joylashgan tuman (shahar)dagi birinchi bosqichdan boshlab ishtirok etadi.

11. Tanlovda ishtirok etishni xohlovchi o'qituvchilar <http://bit.ly/teacher-of-year> havolasi orqali ro'yxatdan o'tadilar. Ishtirokchi ro'yxatdan o'tish jarayonida pasport, mutaxassisligi, amaldagi malaka toifasi, faoliyat yuritayotgan ta'lim muassasasi hamda mehnat faoliyati to'g'risidagi ma'lumotlarni onlayn ro'yxatga olish tizimiga lotin alifbosida kiritadi.

O'zi haqida noto'g'ri yoki to'liq ma'lumot taqdim etmagan ishtirokchi tanlovdan chetlatiladi.

12. Onlayn ro'yxatdan o'tgan nomzodlarning ro'yxati Xalq ta'limi vazirligi tomonidan tuman (shahar) kesimida hududiy xalq ta'limi boshqarmalariga yetkaziladi.

13. Tanlovning har bir bosqichida 76 va undan yuqori ball to'plagan ishtirokchilar orasidan bir nafardan 1-, 2-, 3-o'rin g'oliblari aniqlanadi. Har bir bosqichdan faqat birinchi o'rinni egallagan bir nafar g'olib keyingi bosqichda ishtirok etish huquqini qo'lga kiritadi.

14. Ishtirokchilarning ballari teng bo'lib qolgan taqdirda, tegishli fan bo'yicha qo'shimcha 10 tadan test savollari berish orqali g'olib aniqlanadi. G'olib aniqlanguniga qadar test jarayoni takroriy davom ettiriladi. Mazkur qoida tanlovning barcha bosqichlarida amal qiladi.

15. Respublika bosqichida qatnashib, 1-, 2-, 3-o'rinni qo'lga kiritgan o'qituvchilar 5 yildan so'ng (shu jumladan, turdosh fanlardan) yana qaytadan

ishtirok etishlari mumkin.

#### **4-bob. Tanlovni o'tkazishning tashkiliy masalalari**

16. Qoraqalpog'iston Respublikasi Xalq ta'limi vazirligi, Toshkent shahar xalq ta'limi bosh boshqarmasi, viloyatlar xalq ta'limi boshqarmalari, tuman (shahar) xalq ta'limi bo'limlari:

tuman (shahar) xalq ta'limi bo'limlari va ta'lim muassasalari bilan birgalikda mazkur Nizom bilan barcha pedagog xodimlarni tanishtiradi;

tuman (shahar), hududiy tashkiliy qo'mitalarini tasdiqlaydi;

tanlovning birinchi va ikkinchi bosqichlari o'tkaziladigan muassasalarni belgilaydi hamda reja-jadvalini ishlab chiqadi;

tanlovning birinchi va ikkinchi bosqichlari nizom talablariga muvofiq uyushqoqlik bilan, yuqori saviyada shaffof va adolatli o'tkazilishini ta'minlaydi;

tanlovning birinchi bosqichi uchun tanlov o'tkaziladigan fanlardan namunaviy dars ishlanmasi mavzularini shakllantiradi;

tanlovning birinchi va ikkinchi bosqichlari yakunlangan kundan kechiktirmay tanlov natijalarini ishtirokchilarga e'lon qiladi;

budjet va homiylik mablag'lari, qonunda taqiqlanmagan boshqa manbalar, kasaba uyushmalari tashkilotlarini jalb etgan holda g'oliblar rag'batlantiriladi;

g'oliblarni navbatdagi bosqichlarga tayyorlash bo'yicha barcha tashkiliy choralarni ko'radi;

tanlovning birinchi va ikkinchi bosqichlari yakuni yuzasidan hujjatlarni rasmiylashtiradi hamda har bir bosqich yakunida Respublika ta'lim markaziga axborot kiritib boradi;

tanlovning uchinchi bosqichi ishtirokchilari va hakamlar hay'ati tarkibiga kiritilgan mutaxassislarning tashkiliy qo'mita belgilagan muddatlarda tanlov o'tkaziladigan hududlarga o'z vaqtida yetib borishlarini ta'minlaydi.

17. Respublika ta'lim markazi:

ta'lim-tarbiya mazmuniga oid talablar asosida tanlovning ikkinchi va uchinchi bosqichlari uchun tanlov o'tkaziladigan fanlardan namunaviy dars ishlanmasi mavzulari hamda barcha bosqichlar uchun testlar bankini shakllantiradi;

barcha bosqichlarda tanlov shartlari uchun baholash mezonlarini ishlab chiqadi;

tanlovning barcha bosqichlarini muvofiqlashtirib boradi;

tanlovning birinchi va ikkinchi bosqichlarida ishtirokchilarning olgan ballarini umumlashtirib, Xalq ta'limi vazirligiga taqdim etadi;

tanlovning uchinchi bosqichi ishtirokchilari ro'yxatini shakllantiradi;

tanlovning barcha bosqichlari uchun test jarayonlarini tashkil etish, natijalarni umumlashtirish bo'yicha samarali hisoblangan elektron dasturni tayyorlaydi;

elektron dasturga tayyorlangan testlar bankini joylashtiradi;

barcha bosqichlarda ishtirokchilarning onlayn test jarayonlarini o'tkazadi;

tanlovning barcha bosqichlari natijalarini tahlil qiladi, umumlashtiradi va Xalq ta'limi vazirligiga axborot kiritadi.

18. Xalq ta'limi tizimida axborot kommunikatsiya texnologiyalarini rivojlantirish markazi onlayn test jarayonlarini o'tkazishda Respublika ta'lim markaziga AKT sohasida malakali mutaxassislar va texnik tomondan yordam ko'rsatadi.

19. Tanlov o'tkaziladigan ta'lim muassasalari kompyuter qurilmalari va zaruriy jihozlar bilan ta'minlangan bo'lishi kerak.

20. Tanlovda ishtirokchilar tomonidan o'tilgan dars mashg'ulotlari videotasvirga tushiriladi.

21. Tanlovning uzviyligini inobatga olgan holda, dars mashg'ulotini o'tish bilan bog'liq bo'lmagan tanlov shartlari dam olish kunlari ham o'tkazilishi mumkin.

### **5-bob. Tanlovning birinchi bosqichini o'tkazish tartibi**

22. Tanlovning birinchi bosqichini o'tkazish mas'uliyati tuman (shahar) xalq ta'limi bo'limlari zimmasiga yuklatiladi.

23. Tanlovning birinchi bosqichi 3 ta shart asosida o'tkaziladi.

24. **Birinchi shart** – test topshirig'i:

ishtirokchilarga tanlov o'tkaziladigan fandan 20 ta test topshirig'i beriladi;

har bir savol uchun aniq fanlardan 3 (uch) daqiqa, ijtimoiy va filologiya fanlaridan 2 (ikki) daqiqadan vaqt beriladi;

har bir to'g'ri javob 2 (ikki) balldan baholanadi, jami 40 (qirq) ballni tashkil etadi;

birinchi shart natijalariga ko'ra 26 va undan yuqori ball to'plagan ishtirokchilar ikkinchi shartda ishtirok etish huquqiga ega bo'ladi;

test sinovlari tasdiqlangan reja bo'yicha, Respublika ta'lim markazi tomonidan tayyorlangan materiallar asosida, belgilangan ta'lim muassasasining kompyuterlarida onlayn tartibda topshiriladi.

25. **Ikkinchi shart** – dars ishlanmasini tayyorlash:

ishtirokchilar tomonidan qur'a tashlash yo'li bilan dars ishlanmasi mavzusi tanlanadi;

ishtirokchilar tanlangan mavzu bo'yicha dars ishlanmasini kompyuterda yozadi;

dars ishlanmasini yozish uchun 90 daqiqa vaqt ajratiladi va Respublika ta'lim markazi tomonidan tavsiya etilgan 20 ballik mezon asosida baholanadi;

ikkita shart natijalariga ko'ra 40 va undan yuqori ball to'plagan ishtirokchi bosqichning uchinchi shartida ishtirok etish huquqiga ega bo'ladi.

26. **Uchinchi shart** – dars mashg'uloti o'tish:

ishtirokchilar ikkinchi shartda yozgan dars ishlanmalari asosida notanish sinfda dars mashg'ulotini olib boradi;

dars mashg'uloti o'tiladigan sinflar (parallel) qur'a tashlash yo'li bilan

aniqlanadi;

dars mashg'ulot o'tish uchun 45 daqiqa vaqt beriladi;

dars mashg'uloti Respublika ta'lim markazi tomonidan tavsiya etilgan 40 ballik mezon asosida baholanadi;

27. Tanlovning birinchi bosqichida uchta shart bo'yicha 76 ball va undan yuqori ko'rsatkich qayd etgan ishtirokchilar orasidan har bir fandan eng yuqori ball to'plagan bir nafardan 1-, 2-, 3-o'rinni egallagan sovrindorlar aniqlanadi.

28. Tanlov natijalari tuman (shahar) xalq ta'limi bo'limi yig'ilishida muhokama qilinadi hamda har bir fandan birinchi o'rinni egallagan bir nafar g'olibning navbatdagi bosqichda qatnashishi to'g'risida qaror qabul qilinadi.

29. Tuman (shahar) xalq ta'limi bo'limlari birinchi bosqichda ishtirok etgan ishtirokchilarning olgan ballari haqidagi ma'lumotlarni elektron shaklda hududiy xalq ta'limi boshqarmalariga taqdim etadi.

### **6-bob. Tanlovning ikkinchi bosqichini o'tkazish tartibi**

30. Tanlovning ikkinchi bosqichini o'tkazish Qoraqalpog'iston Respublikasi xalq ta'limi vaziri, Toshkent shahar xalq ta'limi bosh boshqarmasi va viloyatlar xalq ta'limi boshqarmalari boshliqlari zimmasiga yuklatiladi.

31. Tanlovning ikkinchi bosqichi 3 ta shart asosida o'tkaziladi.

32. **Birinchi shart** – test topshirig'i:

ishtirokchilarga tanlov o'tkaziladigan fandan 20 ta test topshirig'i beriladi;

har bir savol uchun aniq fanlardan 3 (uch) daqiqa, ijtimoiy va filologiya fanlaridan 2 (ikki) daqiqadan vaqt beriladi;

har bir to'g'ri javob 2 (ikki) balldan baholanadi, jami 40 (qirq) ballni tashkil etadi;

birinchi shart natijalariga ko'ra 26 va undan yuqori ball to'plagan ishtirokchilar ikkinchi shartda ishtirok etish huquqiga ega bo'ladi;

test sinovlari tasdiqlangan reja bo'yicha, Respublika ta'lim markazi tomonidan tayyorlangan materiallar asosida, belgilangan ta'lim muassasasining kompyuterlarida onlayn tartibda topshiriladi.

33. **Ikkinchi shart** – dars ishlanmasini tayyorlash:

ishtirokchilar tomonidan qur'a tashlash yo'li bilan dars ishlanmasi mavzusi tanlanadi;

ishtirokchilar tanlangan mavzu bo'yicha dars ishlanmasini kompyuterda yozadi;

dars ishlanmasini yozish uchun 90 daqiqa vaqt ajratiladi va Respublika ta'lim markazi tomonidan tavsiya etilgan 20 ballik mezon asosida baholanadi;

ikkita shart natijalariga ko'ra 40 va undan yuqori ball to'plagan ishtirokchi bosqichning uchinchi shartida ishtirok etish huquqiga ega bo'ladi.

34. **Uchinchi shart** – dars mashg'uloti o'tish:

ishtirokchilar ikkinchi shartda yozgan dars ishlanmalari asosida notanish sinfda dars mashg'ulotini olib boradi;

dars mashg'uloti o'tiladigan sinflar (parallel) qur'a tashlash yo'li bilan aniqlanadi;

dars mashg'uloti o'tish uchun 45 daqiqa vaqt beriladi;

dars mashg'uloti Respublika ta'lim markazi tomonidan tavsiya etilgan 40 ballik mezon asosida baholanadi;

35. Tanlovning ikkinchi bosqichida uchta shart bo'yicha 76 ball va undan yuqori ko'rsatkich qayd etgan ishtirokchilar orasidan har bir fandan eng yuqori ball to'plagan bir nafardan 1-, 2-, 3-o'rinni egallagan sovrindorlar aniqlanadi.

36. Tanlov natijalari hududiy xalq ta'limi boshqarmalarining yig'ilishida muhokama qilinadi hamda har bir fandan birinchi o'rinni egallagan bir nafar g'olibning navbatdagi bosqichda qatnashishi to'g'risida qaror qabul qilinadi.

37. Hududiy xalq ta'limi boshqarmalari birinchi va ikkinchi bosqich ishtirokchilarining olgan ballari haqidagi ma'lumotlarni elektron shaklda Respublika ta'lim markaziga taqdim etadi.

38. Hududiy xalq ta'limi boshqarmalari birinchi va ikkinchi bosqich yakunlari asosida o'qituvchilarning bilimida kuzatilgan bo'shliqlarni to'ldirish, kasbiy mahoratlarini oshirish bo'yicha tegishli chora-tadbirlarni belgilaydi, metodistlar va o'qituvchilar uchun tegishli metodik tavsiyalar ishlab chiqadi, joylarga yetkazadi.

### **7-bob. Tanlovning uchinchi bosqichini o'tkazish tartibi**

39. Tanlovning uchinchi bosqichi Respublika tashkiliy qo'mitasi va Respublika ta'lim markazining bevosita rahbarligida tashkil etiladi hamda o'tkaziladi.

40. Tanlovning uchinchi bosqichi 3 ta shart asosida o'tkaziladi va ishtirokchilar barcha shartlarda to'liq qatnashadilar.

41. **Birinchi shart** – dars mashg'uloti o'tish:

ishtirokchilar dars mashg'uloti o'tish ketma-ketligi, dars mavzulari, mashg'ulot o'tkaziladigan sinflarni (parallel) qur'a tashlash yo'li bilan tanlab oladi. Qur'a tashlash ushbu shartdan bir kun avval o'tkaziladi;

dars mashg'uloti o'tish uchun 45 daqiqa vaqt beriladi;

dars mashg'uloti Respublika ta'lim markazi tomonidan tavsiya etilgan 50 ballik mezon asosida baholanadi.

42. **Ikkinchi shart** – ishtirokchilarning loyiha taqdimotlarining baholanishi:

ishtirokchilar ta'lim sifatini oshirishda (ta'lim mazmuni, o'quv metodik qo'llanmalar, ta'limda metodikani qo'llash, ta'limga innovatsiyalarni joriy etish, o'quvchilarni baholash, ta'lim sifatining natijaviyligi) mavjud muammolar va ularning yechimlari, o'qituvchining zamonaviy imidji, zamonaviy o'qituvchiga rivojlangan davlatlarda qo'yiladigan talablar to'g'risida loyiha taqdimotlari tayyorlaydi;

ishtirokchilarning loyiha taqdimotlari Respublika ta'lim markazi tomonidan tavsiya etilgan 20 ballik mezon asosida hakamlar hay'ati a'zolari tomonidan

baholanadi.

43. **Uchinchi shart** – test topshirig'i:

ishtirokchilarga tanlov o'tkazilayotgan fan bo'yicha 20 tadan test savollari beriladi;

har bir savol uchun aniq fanlardan 3 (uch) daqiqa, ijtimoiy va filologiya fanlaridan 2 (ikki) daqiqadan vaqt beriladi;

test savollarining har bir to'g'ri javobi 1,5 (bir yarim) ball bilan baholanadi va umumiy 30 ballni tashkil etadi.

test sinovlari onlayn tartibda o'tkaziladi.

44. Tanlovning respublika bosqichi yakunida uchta shartga ko'ra barcha fanlardan 76 va undan yuqori ball to'plagan ishtirokchilar orasidan bir nafardan birinchi o'rinni egallagan "Yilning eng yaxshi fan o'qituvchisi" hamda 2-, 3-o'rinni egallagan sovrindorlar aniqlanadi va e'lon qilinadi.

45. Tanlovning Respublika bosqichi barcha shartlarida tanlov qatnashchilarining ishtiroki onlayn tarzda kuzatib boriladi va videotasvirga olinadi. Alohida tashkillashtirilgan joyda hududiy xalq ta'limi boshqaruvi organlari, jamoatchilik va ommaviy axborot vositalarining vakillariga tanlov jarayonlarini to'g'ridan-to'g'ri kuzatib borish imkoniyati yaratiladi.

### **8-bob. Hakamlar hay'ati, ekspert komissiyasi va kuzatuvchilar**

46. Tanlovning barcha bosqichlarini shaffof, xolisona va adolatli o'tkazish maqsadida har bir fandan ilg'or o'qituvchilardan iborat hakamlar hay'ati, ekspert komissiyasi hamda kuzatuvchilar tarkibi tuziladi hamda tashkiliy qo'mita tomonidan tasdiqlanadi.

47. Tanlovning ikkinchi hamda uchinchi bosqichlarida hakamlar hay'ati tarkibiga har bir hududdan bir nafardan ilg'or tajribali o'qituvchilar kiritiladi. Ishtirokchi bilan bitta hudud (tuman, shahar, viloyat)dan ishtirok etayotgan hakamlar hay'ati vakili ishtirokchini baholamaydi.

48. Hakamlar hay'ati a'zolari orasidan rais ochiq ovoz berish yo'li bilan saylanadi.

49. Hakamlar hay'ati a'zolari ishtirokchilarning tegishli fan bo'yicha bilimi, dars mashg'ulotlari, savodxonligini adolatli baholaydi, baholash mezonini asosida g'oliblarning yakuniy bosqichda olgan baholarini umumlashtirgan holda tanlov g'oliblarini aniqlab beradi.

50. Hakamlar hay'ati a'zolarining xulosalari qaror bilan rasmiylashtiriladi. Ishtirokchilarning faoliyatini baholayotgan har bir hakamlar hay'ati a'zosi o'z balini qo'yadi va sanoq komissiyasiga taqdim etadi.

51. Sanoq komissiyasi ballarni qo'shib, o'rtacha ballni chiqaradi va natijani e'lon qiladi.

52. Sanoq komissiyasi hakamlar hay'ati a'zolari o'rtasida qur'a tashlash yo'li bilan belgilanadi.

53. Tanlov jarayonida tashkiliy qo'mita, hakamlar hay'ati, apellyatsiya va

ekspert komissiyasi a'zolarining yaqin qarindoshlari yoki ish joyidan o'qituvchilar ishtirok etayotganligi aniqlansa, bu holat bo'yicha dalolatnoma tuziladi hamda ular tegishlilik bo'yicha tashkiliy qo'mita, hakamlar hay'ati yoki ekspert guruhi a'zolari tarkibidan chiqariladi.

### **9-bob. Tanlovning apellyatsiya komissiyasi**

54. Tanlov ishtirokchilari tomonidan bildirilgan yozma ariza va e'tirozlarni ko'rib chiqish uchun har bir fandan apellyatsiya komissiyasi tarkibi tasdiqlanadi. Ishtirokchilarning tanlov jarayoni va shartlari bo'yicha bildirgan yozma arizasi joyida faqat apellyatsiya beruvchi o'qituvchi ishtirokida (boshqalarning bu jarayonga aralashishiga yo'l qo'yilmaydi) komissiya a'zolari tomonidan shu kunning o'zida ko'rib chiqiladi hamda xulosalar rasmiylashtiriladi.

### **10-bob. Tanlov g'oliblarini taqdirlash**

55. Tanlovning birinchi bosqichida har bir fandan bir nafardan 1-, 2-, 3-o'rinlarni egallagan ishtirokchilar tuman (shahar) xalq ta'limi bo'limining faxriy yorlig'i, qonunda taqiqlanmagan boshqa manbalar, kasaba uyushmalari va homiylarni jalb etgan holda esdalik sovg'alari bilan taqdirlanadi.

56. Tanlovning Qoraqalpog'iston Respublikasi, Toshkent shahar va viloyatlar bosqichida har bir fandan bir nafardan 1-, 2-, 3-o'rinlarni egallagan ishtirokchilar faxriy yorliq, qonunda taqiqlanmagan boshqa manbalar, kasaba uyushmalari va homiylarni jalb etgan holda hududiy boshqaruv idoralarining esdalik sovg'alari bilan taqdirlanadi. Shuningdek, g'olib va sovrindorlarni umumta'lim muassasalarining direktor jamg'armasidan rag'batlantirish bo'yicha tavsiya beriladi.

57. Tanlovning respublika bosqichi yakunlariga ko'ra g'oliblar quyidagi tartibda rag'batlantiriladi:

har bir fandan bir nafardan 1-o'rinni egallagan o'qituvchilar o'rnatilgan tartibda Xalq ta'limi vazirligining "Yilning eng yaxshi fan o'qituvchisi" I darajali diplomi, "O'zbekiston Respublikasi xalq ta'limi a'lochisi" ko'krak nishoni va bir martalik pul mukofoti bilan;

har bir fandan bir nafardan 2-o'rinni egallagan o'qituvchilar Xalq ta'limi vazirligining "Yilning eng yaxshi fan o'qituvchisi" II darajali diplomi va bir martalik pul mukofoti bilan;

har bir fandan bir nafardan 3-o'rinni egallagan o'qituvchilar Xalq ta'limi vazirligining "Yilning eng yaxshi fan o'qituvchisi" III darajali diplomi va bir martalik pul mukofoti bilan taqdirlanadi.

Respublika bosqichi g'oliblari hududiy kasaba uyushmalari bilan kelishilgan holda belgilangan tartibda sihatgohlarga yo'llanmalar berishga tavsiya etiladi.

58. Tanlovning respublika bosqichida ishtirok etgan o'qituvchilarning ish tajribasi respublika, hududlar miqyosida ommalashtiriladi, ular ishtirokida

seminarlar tashkil etiladi.

59. Tanlov g'oliblari tuman (shahar) xalq ta'limi bo'limlari, Qoraqalpog'iston Respublikasi Xalq ta'limi vazirligi, Toshkent shahar xalq ta'limi bosh boshqarmasi va viloyatlar xalq ta'limi boshqarmalari tomonidan davlat mukofotlariga tavsiya etilishi mumkin.

60. Tanlov shartlari, uning o'tkazilish jarayoni va natijalari to'g'risidagi axborotlar vazirlikning [www.uzedu.uz](http://www.uzedu.uz) rasmiy veb-saytida e'lon qilib boriladi.

61. Tanlovning Respublika bosqichida ishtirok etgan o'qituvchilarning eng yaxshi ochiq dars mashg'ulotlari (videodars) va loyiha taqdimotlari Xalq ta'limi vazirligining ijtimoiy tarmoqlardagi rasmiy sahifalari va elektron ta'lim resurslari portallariga joylashtiriladi.

### **11-bob. Yakuniy qoidalar**

62. Tanlovning barcha bosqichlarida ishtirokchidan tashqari uni qo'llab-quvvatlovchilarning tanlov jarayonlariga, tashkiliy qo'mita, hakamlar hay'ati, apellyatsiya va ekspert komissiyasi a'zolari faoliyatiga halaqit berishi, tanlov natijalariga asossiz aralashuvlari qat'iy man etiladi.

63. Mazkur Nizom talablariga rioya qilmagan ishtirokchilar hakamlar hay'ati tomonidan tanlovdan chetlashtirilib, bu haqida hay'at raisi va a'zolari tomonidan imzolangan dalolatnoma tuziladi.

64. Ushbu Nizom talablarini buzgan shaxslar qonun hujjatlariga muvofiq javobgarlikka tortiladi.

**“Yilning eng yaxshi fan o'qituvchisi-2020” tanlovini o'tkazish tartibi  
SXEIASI**

| Bosqichlar | Amalga oshiriladigan ishlar mazmuni                                                                                                                                                          | Amalga oshirish shakli                                                                                                                                                                                                                                              | Muddatlar                                            |
|------------|----------------------------------------------------------------------------------------------------------------------------------------------------------------------------------------------|---------------------------------------------------------------------------------------------------------------------------------------------------------------------------------------------------------------------------------------------------------------------|------------------------------------------------------|
| 1-qadam    | Tanlov o'tkazilishi bo'yicha vazirlikning rasmiy sayti va ommaviy axborot vositalarida e'lon berish.<br>Tanlov o'tkaziladigan fanlardan ishtirokchilarni <b>onlayn ro'yxatdan</b> o'tkazish. | Xalq ta'limi vazirligi rasmiy saytida ochilgan alohida ruknda tanlov ishtirokchilari <b>onlayn shaklda ro'yxatdan</b> o'tadi hamda ularning elektron bazasi yaratiladi.                                                                                             | 2020-yil<br>16-31-mart                               |
| 2-qadam    | Tanlovda ishtirok etish uchun onlayn ro'yxatdan o'tgan <b>o'qituvchilar ro'yxati</b> hududiy xalq ta'limi boshqarmalariga taqdim etiladi.                                                    | Ishtirokchilar ro'yxati tuman (shahar)lar kesimida hududiy xalq ta'limi boshqarmalariga taqdim etiladi.                                                                                                                                                             | 2020-yil<br>3-aprel                                  |
| 3-qadam    | Tanlovning <b>birinchi (tuman, shahar) bosqichini</b> o'tkazish.                                                                                                                             | <b>Ishtirokchilar:</b><br>1) Onlayn test sinovidan o'tkaziladi.<br>2) Dars ishlarnasi yozadilar.<br>3) Notanish sinfda ochiq dars mashg'ulotini o'tadilar.                                                                                                          | 2020-yil<br>8-15-aprel<br>16-18-aprel<br>20-22-aprel |
| 4-qadam    | Ishtirokchilarning birinchi bosqichda olgan ballari to'g'risidagi ma'lumotni <b>elektron shaklda (tasdiqlangan)</b> hududiy xalq ta'limi boshqarmalariga taqdim etish.                       | Tuman (shahar) xalq ta'limi bo'limi tomonidan birinchi bosqichda ishtirok etgan barcha qatnashchilarning to'plagan ballari to'g'risidagi ma'lumotni hududiy xalq ta'limi boshqarmalariga taqdim etiladi.<br>Hududiy xalq ta'limi boshqarmalari mazkur ma'lumotlarni | 2020-yil<br>24-aprel<br><br>2020-yil                 |

|         |                                                                                                                                                               |                                                                                                                                                                                                                  |                                                          |                                                       |
|---------|---------------------------------------------------------------------------------------------------------------------------------------------------------------|------------------------------------------------------------------------------------------------------------------------------------------------------------------------------------------------------------------|----------------------------------------------------------|-------------------------------------------------------|
|         |                                                                                                                                                               |                                                                                                                                                                                                                  | umumlashtirib, Respublika ta'lim markaziga taqdim etadi. | 27-aprel                                              |
| 5-qadam | Tanlovning <b>ikkinchi (hududiy) bosqichini</b> o'tkazish.                                                                                                    | <b>Ishtirokchilar:</b><br>1) Onlayn test sinovidan o'tkaziladi.<br>2) Dars ishlanmasi yozadilar.<br>3) Notanish sinfda ochiq dars mashg'ulotini o'tadilar.                                                       |                                                          | 2019-yil<br>6-8-may<br>11-12-may<br>13-15-may         |
| 6-qadam | Ishtirokchilarning ikkinchi bosqichda olgan ballari to'g'risidagi ma'lumotni <b>elektron shaklda (tasdiqlangan)</b> Respublika ta'lim markaziga taqdim etish. | Hududiy xalq ta'limi boshqarmalari tomonidan ikkinchi bosqichda ishtirok etgan barcha qatnashchilarning to'plagan ballari to'g'risidagi ma'lumotlar umumlashtirilib, Respublika ta'lim markaziga taqdim etiladi. |                                                          | 2020-yil<br>20-may                                    |
| 7-qadam | Tanlovning <b>respublika bosqichini</b> o'tkazish.                                                                                                            | <b>Ishtirokchilar:</b><br>1) Notanish sinfda ochiq dars mashg'uloti o'tadilar.<br>2) Loyiha taqdimotlari o'tkazadilar.<br>3) Onlayn test sinovidan o'tkaziladi.                                                  |                                                          | 2020-yil<br>14-16-sentabr<br>17-sentabr<br>18-sentabr |
| 8-qadam | Tanlovning respublika bosqichi g'oliblarini aniqlash va ularning ro'yxatini e'lon qilish.                                                                     | Respublika tashkiliy qo'mitasi tomonidan g'oliblar ro'yxati vazirlikning rasmiy sayti va ommaviy axborot vositalarida e'lon qilinadi.                                                                            |                                                          | 2020-yil<br>18-sentabr                                |

**Izoh:** Har bir bosqich ommaviy axborot vositalari va vazirlikning rasmiy veb-sayti hamda ijtimoiy tarmoqlarda yoritib boriladi.  
Ishtirokchilar soniga qarab tanlov shartlarini o'tkazish muddatlariga o'zgartirish kiritilishi mumkin.

**“Yilning eng yaxshi fan o'qituvchisi-2020” respublika tanlovini  
tashkil etish va o'tkazish bo'yicha respublika tashkiliy qo'mitasi  
TARKIBI**

| <b>T/r</b> | <b>Familiyasi, ismi</b> | <b>Lavozimi</b>                                                                                                                                             |
|------------|-------------------------|-------------------------------------------------------------------------------------------------------------------------------------------------------------|
| 1.         | Lavozimi bo'yicha       | Vazirning birinchi o'rinbosari, tashkiliy qo'mita raisi                                                                                                     |
| 2.         | E.Murodov               | Umumiy o'rta ta'lim muassasalari faoliyatini muvofiqlashtirish boshqarmasi boshlig'i, tashkiliy qo'mita raisi o'rinbosari                                   |
| 3.         | L.Magay                 | Xodimlar bilan ishlash boshqarmasi boshlig'i o'rinbosari, a'zo                                                                                              |
| 4.         | H.Daminov               | Respublika ta'lim markazi direktori, a'zo                                                                                                                   |
| 5.         | A.Umarov                | Jamoatchilik va ommaviy axborot vositalari bilan aloqalar bo'limi boshlig'i, a'zo                                                                           |
| 6.         | N.Xayitov               | Xalq ta'limi vazirligi bosh mutaxassisi, mas'ul kotib                                                                                                       |
| 7.         | Sh.Qayumov              | Xalq ta'limi sohasida AKTni rivojlantirish markazi direktori, a'zo                                                                                          |
| 8.         | M.D.Pardaeva            | Respublika ta'lim markazi direktori o'rinbosari, a'zo                                                                                                       |
| 9.         | Lavozimiga ko'ra        | Qoraqalpog'iston Respublikasi xalq ta'limi vaziri, Toshkent shahar xalq ta'limi bosh boshqarmasi va viloyatlar xalq ta'limi boshqarmalari boshliqlari, a'zo |

**“Yilning eng yaxshi fan o‘qituvchisi-2020” respublika tanlovini o‘tkazish muddatlari  
JADVALI**

| <b>T/r</b> | <b>Bosqich</b>                                 | <b>Test</b>            | <b>Dars ishlanma<br/>yozish</b> | <b>Dars<br/>mashg'uloti<br/>o'tish</b> | <b>Ishirokchilarning<br/>loyiha taqdimotlari<br/>o'tkazilishi</b> |
|------------|------------------------------------------------|------------------------|---------------------------------|----------------------------------------|-------------------------------------------------------------------|
| 1.         | Tuman (shahar) bosqichi                        | 2020-yil<br>8-15-aprel | 2020-yil<br>16-18-aprel         | 2020-yil<br>20-22-aprel                | x                                                                 |
| 2.         | QQR, Toshkent shahar va<br>viloyatlar bosqichi | 2020-yil<br>6-8-may    | 2019-yil<br>11-12-may           | 2019-yil<br>13-15-may                  | x                                                                 |
| 3.         | Respublika bosqichi                            | 2020-yil<br>18-sentabr | x                               | 2020-yil<br>14-16-sentabr              | 2020-yil<br>17-sentabr                                            |

O'zbekiston Respublikasi  
Xalq ta'limi vazirining  
2020-yil "5" mart dagi  
66-sonli buyrug'iga  
5-ILOVA

**"Yilning eng yaxshi fan o'qituvchisi-2020"**  
**respublika tanlovi o'tkaziladigan fanlar ro'yxati**  
**va Respublika bosqichi o'tkaziladigan hududlar**

| T/r | Tanlov o'tkaziladigan fanning nomi                                       | O'tkazilish joyi     |
|-----|--------------------------------------------------------------------------|----------------------|
| 1.  | Ona tili va adabiyot (ta'lim o'zbek tilida olib boriladigan maktablarda) | Surxondaryo viloyati |
| 2.  | Rus tili (ta'lim o'zbek tilida olib boriladigan maktablarda)             | Toshkent shahri      |
| 3.  | Matematika                                                               | Namangan viloyati    |
| 4.  | Informatika                                                              | Toshkent viloyati    |
| 5.  | Fizika                                                                   | Navoiy viloyati      |
| 6.  | Biologiya                                                                | Qashqadaryo viloyati |
| 7.  | Kimyo                                                                    | Xorazm viloyati      |
| 8.  | Tarix                                                                    | Buxoro viloyati      |
| 9.  | Nemis tili                                                               | Samarqand viloyati   |
| 10. | Fransuz tili                                                             | Farg'ona viloyati    |
| 11. | Tasviriy san'at va chizmachilik                                          | Andijon viloyati     |
| 12. | Texnologiya                                                              | Sirdaryo viloyati    |
| 13. | Iqtisodiy bilim asoslari                                                 | Jizzax viloyati      |

**Izoh:** Qoraqalpoq tili va adabiyoti fanidan "Yilning eng yaxshi fan o'qituvchisi" tanlovi III bosqichda yakunlanadi hamda Qoraqalpog'iston Respublikasida o'tkaziladi.